

La Svizra avant impurtantas decisiuns

Economiesuisse fa pretensiuns

DA LUCAS DEPLAZES / ANR

■ **Economiesuisse pretenda che la politica tschentia las dretgas prioritads davart la refurma da taglias, las relaziuns cun l'UE e la realisaziun dals divers projects d'infrastructura. Ella vul ina concorrenza correcta e dapli trasparenza tar ils custs per l'infrastructura.**

La Svizra haja dumagnà cun bravura las consequenzas negativas dal ferm franc svizzer suenter la dismesa dal curs fix visavi l'euro, ha constatà *Heinz Karrer*, il president d'Economiesuisse, a chaschun d'ina conferenza da pressa a Berna. Bain ha Karrer renconuschì ils problems dal sector turistic e da l'industria da l'export. Per Economiesuisse saja stà l'onn 2015 in onn da grond success, principalmain areguard las diversas campagnas politicas. L'economia saja s'engaschada cun success cunter l'iniziativa «Taglia sin l'energia empè da taglia sin la plivalità» e la «Taglia sin l'ierta». Er en vista a las proximas votaziuns federalas vegnia a s'engaschar Economiesuisse. En quest senn sustegna l'economia la construcziun d'in segund tunnel per autos al Gottard en connex cun la sanaziun dal tunnel existent, Eco-



Heinz Karrer, president Economiesuisse (a sanestra) e Monika Ruehl, presidenta dal directori, èn s'exprimids davart las novas prioritads da la Svizra per il futur. KEYSTONE

nomiesuisse refusa dentant las ulteriuras traits refurmas che vegnan en votaziun il 28 da favrer proxim.

Las forzas burgaisas rinforzadas

Economiesuisse è satisfatga da las davos elecziuns en il parlament federal.

Quellas hajan rinforzà la posiziun burgaisa, quai che vegnia ad esser positiv per la Svizra, è persvas Karrer. Per l'economia svizra sajan da gronda impurtanza las relaziuns cun l'Unìun europeica (UE). Davart la realisaziun da l'iniziativa cunter l'immigraziun a massa suste-

gna Economiesuisse la strategia dal cussegl federal che prevesa ina clausula da protecziun tar l'immigraziun e la prioritad da lavur per persunas indigenas, senza dentant stuair annunziar mintga piazza libra. *Monika Ruehl*, la gestiunaria d'Economiesuisse, deplorescha ch'il cussegl federal haja reduciì ils contingents per persunas or dals Terz-pajais, quai vul dir ordaifer l'Europa. Tals contingents èn reservads per singulas forzas da lavur spezialisadas senza la pussaivladad da laschar immigrar tut la famiglia. Economiesuisse vul sclauder l'uniun da la famiglia en cas che commembers retiran prestaziuns socialas supplementaras. En vista a las proximas decisiuns politicas appellescha Karrer al parlament federal da prender resguard sin las interpresas da producziun e da na surchargiar quellas finanzialmain en connex cun «Strategias per l'energia 2050» u cun las iniziativas «AVSplus» ed «Economia verda».

Per ina infrastruttura effizienta

Karrer pretenda dapli concorrenza sin il sector da l'infrastructura e dapli trasparenza davart ils custs. Da princip duain

vegnir curclads ils custs dals utilisaders. Cun in meglier diever da l'informatica moderna duess quai esser pussaivel d'augmentar l'effizienz. Economiesuisse pretenda plinavant da dismetter il davos monopol da La Posta per las brev che vala actualmain per brev fin 50 grams.

Tgi è Economiesuisse?

?Economiesuisse è l'organisaziun tetgala da l'economia svizra. Ella represchenta e defenda ils interess da ses commembers en tut ils sectors da la politica d'economia. Plinavant procura ella er per cundiziuns da rama optimalas per l'economia svizra. 100 uniuns da bransch, 20 chombras da commerzi chantunals e diversas interpresas singulas fan part d'Economiesuisse. Economiesuisse represchenta tut en tut 100 000 interpresas svizras or da tut las bransch cun var dus milliuns plazs da lavur.